

միակերպ մի երգ, կարծես իրանց կառքը քաշող բազմամբոխ լուծը քաջալերելու համար:

Դժևար տեղերում կամ կառքը անկիւնից ծռելիս նրանց օգնութեամբ էին վեր ցատկում ուրիշ երկու հոգի էլ, նոյնպէս հովհարներով զինւած, եւ չորսը միասին աւելի եռանդուն կերպով շարժում էին իրանց իրաններն ու հովհարները, ու խումբն էլ ցածում աւելի եռանդուն կերպով ձգում էր իր պարանը:

Առաջին կառքին հետեւեցին բազմաթիւ զարդարուն պատգարակներ զանազան այլաբանական իրերով ու սրբութիւններով. մէկի մէջ մի փոքրիկ տնակ ու մի գեղջկուհու խրտուխակ, միւսի մէջ մի ինչ որ աստուած, եւ այսպէս անընդհատ: Ետեւից գալիս էր մի նաւ անիւների վրա դրւած, մէջը նորից երաժիշտներ, այնուհետեւ մի խումբ նաւաստիներ նաւապետի առաջնորդութեամբ:

Սրանով էլ վերջացաւ թափօրը, որը՝ որչափ հասկանալ կարողացայ, ամառայ ու պտղաբերութեան յաղթանակն էր ուզում ներկայացնել: